

繡刻紅梨

記定本

目錄

第一齣 蒼指

第二齣 詩要

第三齣 豪譙

第四齣 羈迹

第五齣 胡擾

第六齣 赴約

第七齣 請成

第八齣 脫禁

第九齣 獻妓

第十齣 出關

第十一齣 錯認

第十二齣 投雍

第十三齣 憶友

第十四齣 路紓

第十五齣 訴衷

第十六齣 托寄

第十七齣 潛窺

第十八齣 奸竄

第十九齣 初會

第二十齣 誅奸

第二十一齣 詠梨

第二十二齣 逼試

第二十三齣 再錯

第二十四齣 赴試

第二十五齣 憶主

第二十六齣 閨慮

第二十七齣 發跡

第二十八齣 得書

第二十九齣 三錯

第三十齣 永慶

紅梨記

明 徐復祚 著

第一齣 薈指

〔瑤輪第五曲〕〔末上〕華堂開玳筵列。尊俎雖陳。主賓未決。且將行酒付優伶。喜轉眼間悲懽聚別。也非關朝家事業。也非關市曹瑣屑。打點笑口頻開。此夜只譚風月。論賣文生涯拙。豈是誇多。何曾鬪捷。從來抱膝便長吟。覺一霎時壯心慙折。也無甚搬枝運節。也無甚陽秋褒貶。若還見者吹毛。甘罵老奴饒舌。

〔照常向內問答訖白〕

〔瑤輪第六曲〕謝女佳人。趙郎才子。天然分付成雙。奈王黼勒取。拆散兩鴛鴦。正遇胡人圍汴。徵歌妓送入金邦。賴有花婆女俠。設謀竄取。潛地往他鄉。才子彷徨。佳人淪落。此際實堪傷。幸錢君作宰。留寓在衙旁。卻慮功名未就。改名姓潛結鸞凰。又賴花婆勸駕。登龍歸娶。花燭影搖光。

俊風流趙狀元三錯認。

喬紅梨謝素秋兩花陣。

雍丘宰生扭就鳳鸞交。

賣花婆計掇賺龍頭僞。

第二齣 詩要

〔破齊陣〕〔生扮趙汝州上〕文采南金比色。詞華北斗方高。太白星精。義山浪子。

誰似風流俠少。天上玉蜍欣獨占。河中匹鳥恨難招。何時琴瑟調。〔鷓鴣天〕紫雲

垂耀是神京。走馬揮鞭意氣生。李賀齊名時譽在。曹劉割席世人驚。空冀駿。戮長鯨。行看奏對人延

英。但令姓字先羣彥。始信才華擅二京。小生姓趙。名汝州。表字伯疇。山東濟南郡淄川人也。先人趙

幾。拜刑部尙書。不幸蚤年身喪。遺經在笥。栢棣未忘。小生幼有慧質。長多俠思。年方二十二歲。忝中

本省解元。今來會試到京。憑着我胸中學問。足三冬。口內詞鋒。傾五岳。視一第如拾芥耳。何足挂意。

但恨花星未耀。鸞運尙慳。自古才子。必擇佳人。是以交甫鍾情于解佩。陳思作賦于感甄。如小生之

風流才調。必得天下第一個佳人。方稱合璧。向來聞得人言云。男中趙伯疇。女中謝素秋。〔笑介〕

不知素秋怎麼樣。一個女子。就堪與小生作對。一向問人。並無識者。昨入京來。纔知是教坊妓女。說

道果然天姿國色。絕代無雙。小生連連去訪。不意今上預借元宵。在大內承直。尚未得會。心上且是放不下。有個同窗朋友錢孟博。乃雍丘縣令。朝覲來此。與小生同寓。不免請他出來。再去訪素秋走一遭。錢兄快來。〔外扮錢濟之上〕

〔前腔〕看盡河陽花錦。來聽上苑鶯嬌。閨里燈光。天邊雪月。欣逢預放元宵。百斛春醪那借取。三齊豪客未須招。渾忘鄉思搖。下官錢濟之。字孟博。官拜雍丘令。今來

朝覲。幸與故友趙伯疇同寓在此。〔見介〕呀。伯疇兄拜揖。〔生〕孟博兄拜揖。孟博。我同你訪謝

素秋去。〔外笑介〕伯疇。我道你有要緊說話。請我出來。元來又是訪謝素秋一個女子。日日挂在念頭上。敢是你心偏了。前日兩次訪他。俱不得遇。風塵中人。知他真不在家。還是故意回你。〔生〕

天下那有不愛才子的佳人。〔外〕好笑。你又不曾見他。那知他佳不佳。〔生〕文王寤寐而求。未聞先見淑女。相如援琴而鼓。何曾預識文君。謝素秋雖不曾見。人言決不虛謬。〔外〕人言若何。

〔生〕道是男中趙伯疇。女中謝素秋。堪與小生同說。一定有些不同處。〔外笑介〕好一個乾相思的對頭。不要作癩。同你街坊上看燈去。〔生〕燈有甚好看。

〔玉芙蓉〕咸陽寂寞宵。擁膝傷懷抱。恨無媒徑路草自蕭蕭。玉樓未許諧蕭史。金屋何妨佇阿嬌。教人惱。惱的是孤鸞星永照。最堪憐黃昏落葉響瀟瀟。〔外〕〔前腔〕你青雲志正驕。紅粉何足道。喜春風得意正在今朝。豈可爲鶯儔燕侶。三春約。忘卻你鵬路鵬程萬里遙。〔生笑介〕功名怕不到手。所難得者佳人耳。孟博兄不要敗興。不要道學。〔外〕非執拗。那壁廂是牆花路草。怎比得日邊紅杏倚雲高。〔丑扮平頭上〕傳卻玉樓信。來投金馬門。小人是東院子謝家平頭。俺姐姐差送書與趙解元。一路問來。說道下處在此不免問聲。〔問介內答〕正是。〔丑入磕頭生〕誰家差來的。〔丑〕小人是東院謝家平頭。俺姐姐蒙相公下顧。因在內府上直。兩次不曾相接。特着小人來拜上。〔生〕可曾說教我來麼。〔丑〕正是教請相公來。今日是十八日。燈事已了。明日姐姐一定回家。教請相公蚤蚤來了。兼有一書在此。〔生喜介〕孟博兄。你說風塵中人。我說佳人定愛才子。今卻如何。快取書來。〔拆看介〕元來是一首詩。倚窗閒瑣去看花。辜負郎君白鼻騮。悵悵欲知深幾許。碧雲重疊暮山斜。孟博兄。天下有這樣一個女子。怎教小弟不想。〔外〕詩思到也清新。明日同兄去便了。〔丑〕小人就要回俺姐姐。就

求相公回書。〔外〕伯疇。你也作一絕答他便了。〔生〕小弟正欲如此。〔作寫介〕主人應懷客空還。寄與封書有淚斑。但得卷簾心不死。碧雲能隔幾重山。平頭。你先去回覆姐姐。小生明日一定蚤來。
〔丑〕傳將芳信去。報與玉人知。〔下生外弔生〕

〔傾杯序〕多嬌。勝道韞過薛濤。更入法能奇妙。小弟若得此人同偕伉儷呵。也強如蟾宮穩步。龍門高跳。鳳池容與。鼇禁逍遙。但只恐東牆花落。西廂月冷。巫岫雲高。那時節呵。就狀元及第也徒勞。〔外〕

〔朱奴兒犯〕伯疇。你不害癩麼。看你整備着烏紗小帽。早朝鞦窄窄鮮好。稱體新衣袖寬綽。會親符安排了百道。〔生接〕快活快活。那時節相偎抱。醉春風碧桃。任流蘇帳煖可憐宵。〔外〕

〔尾聲〕則怕歡娛極處生煩惱。〔生〕孟博兄。準備下扶頭錢鈔。怎能勾偷一會兒更籌須臾的天便曉。

身在仙宮第幾重。

未知何日得相從。

何時最是思君處。

月入斜窗曉寺鐘。

第三齣 豪譏

〔西地錦〕〔小淨扮王黼上〕皓月金門午夜。和風玉殿先春。內庭曲宴及詞臣。誰似我天顏常近。臘底陽生月正晴。士民遊樂慶昇平。熙熙萬象融和裏。共沐恩光賀聖明。下官姓王。名黼。字將明。開封祥符人也。官拜太傅。封楚國公。下官性頗黠慧。又善口辯。遭遇聖上。寵冠羣僚。身雖三公。位居元宰。深宮曲宴。無不陪扈。下官又故爲諧謔。獻笑取悅。聖上呼我爲小王。太傅。我就稱聖上爲太上道君。一日聖上站在牆邊。要上牆去。奈無梯子。我就把兩臂承聖足而起。大聲叫道。好個扒牆天子。聖上大笑。說全虧你築巖宰相。目今海內乂安。朝廷無事。我就上一本。說今天氣和煖。正該及時爲樂。就此十二月。令民間搭造燈棚。名曰預借元宵。聖上大喜。設宴在內庭。特令下官陪侍。因此一連數日。不得回家。似此君臣契合。多虧父子情深。我王黼自從拜太尉梁師成爲父。仗他在聖上面前贊揚。遂有今日。昨日太尉說要到我家看燈。當直的。太尉爺就是你老老爺。筵席須要十分齊整。〔雜介小淨〕我且問你。昨日大內承幸的教坊女樂頭兒。叫甚名字。〔雜〕名喚謝素。

秋〔小淨〕今日在我府中答應麼。〔雜〕伺候多時了。〔小淨〕起在一邊。我府中歌童舞女雖多。端沒有這妮子娉婷嫵娜。我要他進我府中。亦有何難。且待宴過了太尉。再作道理。叫打差官快去打聽。太尉爺出朝。急來通報。〔暫下副淨扮內官梁師成上〕

〔前腔〕寶炬騰輝三島。鸞笙叶氣千門。御香滿袖散氤氲。但願得常依龍袞。紫宸朝罷侍鸞班。詔賜宮刀白玉環。官曜自來垂上象。貂璫獨喜近龍顏。下官太尉梁師成。性善柔媚。言多甘悅。出入宮寢三十餘年。歷踐台司二十餘任。都人目爲隱相。天子喚作可兒。宮掖巡遊。常向臂間循絳繫。殿頭宣拜。每將口語代黃麻。將相公卿。個個稱門生故吏。后妃嬪御。人人呼尙父元公。以此賄賂如山。門庭成市。從我者驟加官爵。違我者立見誅夷。兒童已賜緋衣。廝養半登黃甲。大兒王黼。開應奉局于都下。月錢何止萬緡。小兒朱勗。總花石綱于蘇州。歲輸不下億計。〔笑介〕果然財可通神。真個威堪震主。連日內庭侍宴。不曾回家。昨日與王黼兒約去看燈。叫左右打執事看王丞相去。〔雜〕燈火明龍閣。笙歌滿鳳城。侯門多富貴。綺席綵雲迎。稟爺已到王丞相府前了。〔小淨上跪接〕孩兒王黼迎接恩府大人。〔副淨扶進〕王黼兒。生受你。〔小淨起揖〕恩府大人拜揖。〔副淨

笑〕好一個預借元宵的本。虧你想得到。聖上也喜歡得緊。自從建了長嶽。聖上日日在內遊賞。不想時遇隆冬。百卉凋傷。車駕久不臨幸。在大內閒坐不過。見了你的本。不覺喜動天顏。〔小淨〕這都是恩府大人提攜。〔副淨〕王黼兒。我教道你。大凡官家。不要容他閒。常則是把些聲色貨利打哄日子過去。他就不想到政事上邊。左班那些秀才官兒。便有言也不相入了。〔小淨〕多謝恩府大人指教。〔副淨〕叫孩兒們。今日我在此看燈。那些御前承幸妓樂。都齊在這裏麼。〔雜〕稟爺。五花爨弄三百名搬演雜劇。三百名駕前吹鼓。十八部教坊妓女百二十人。都齊在此伺候。〔副淨〕王黼兒。我連日困于酒食。就是這些院本雜劇。也誰耐煩看他。都打發去。止留教坊妓女。在此送酒。〔小淨遞酒介〕奏樂畢。〔衆〕

〔香柳娘〕喜燈月競新。喜燈月競新。寒威乍損。想梅花已漏江南信。看鰲山切雲。看鰲山切雲。青禁玉樓鄰。彤帷絳河近。〔合〕判行樂及辰。判行樂及辰。只恐怕後月今宵。陰晴無準。〔副淨〕

〔前腔〕慶民安物殷。慶民安物殷。太平景運。歡娛賸把良宵儘。任參橫斗分。任

參橫斗分。恁意倒金尊。流光一回瞬。〔合前小淨〕恩府大人。教坊妓女。有個謝素秋。到也生得停當。〔對旦介〕過來見了太尉爺。〔旦見介〕副淨看介。果然生得好。要丞相爺喜歡。你造化到了孩兒們。討個元寶賞他。起來送酒。就唱一曲。〔旦謝起送酒〕

〔前腔〕念青樓寄身。念青樓寄身。柳嬌桃嫩。生憎羅綺烟花陣。怪雙蛾屢顰。怪雙蛾屢顰。處處落花痕。年年送春恨。〔合前小淨〕

〔前腔〕聽歌聲佚塵。聽歌聲佚塵。朱唇微搵。聲聲調出涼州韻。更香潤玉溫。更香潤玉溫。似蘭蕙絕塵氛。繁英豈堪混。〔合前副淨〕酒多了。連日困倦。孩兒們。回府去罷。笙歌歸院落。燈火下樓臺。明日扶殘醉。重尋翠羽來。〔小淨送副淨下小淨弔〕謝素秋過來。我愛你體態輕盈。歌喉宛轉。我府中歌舞雖多。卻沒有你這般顏色。你住我府中罷。我另眼看覷你。〔旦〕念素秋章臺陋質。永巷庸流。祇堪賣酒當壚。難入瓊樓玉館。況且老爺貴府。無數佳冶麗人。豈少賤妾一輩。〔小淨〕這妮子。你不見麼。

〔前腔〕這繁華絕倫。這繁華絕倫。三千黛粉。六宮顏色誰堪遜。不是少你一個。只

是我愛你。你若進我府中。我把你做掌中玉珍。做掌中玉珍。〔作撲旦且避小淨〕心坎兒裏溫存。肺肝兒般幫襯。〔合前旦跪小淨扶起介〕

〔前腔〕媿烟花戶門。媿烟花戶門。風塵陋品。豈堪與王公貴戚相廝湊。況有無數絳裙。有無數絳裙。薦夕總橫陳。東鄰豈足問。〔合前小淨怒介〕咤。這賤人。我到有心擡舉你。你卻句句遠我。我如今把你拘在府中。不怕你走上天去。花婆那裏。〔老旦扮花婆上〕本賣花爲生。翻因花作祟。日間花裏行。夜間花裏睡。花婆磕爺頭。〔小淨〕花婆。你把這賤人去牢禁在府後靜房裏。有呼喚纔許放出。〔老旦〕曉得。只是府中插戴的時鮮花朵。日日是小婦人採辦。〔小淨〕我另遣人便了。

別夢依依到謝家。

名珪似玉淨無瑕。

東風堪賞還堪恨。

落盡溪頭白玉花。〔下〕

第四齣 羈迹

〔旦老旦弔場老旦〕素娘請到後邊去。〔旦走介老旦〕這是老婢的臥房。你只在此坐坐罷。〔旦〕

〔尾犯引〕花落任西東。似柳絮風飄。芙蓉霜送。栽卻愁苗。耘成恨種。〔老旦〕素娘。看你翠蛾蹙遠山黛擁。紅淚流秋水霞籠。〔合〕聽殘漏聲聲聒耳。月落燕樓空。〔老旦〕〔南鄉子〕萬籟寂無聲。殘角鳴鳴近五更。香斷燈昏眠未穩。淒清。只有霜華伴月明。〔旦〕應是夜寒凝。惱得梅花睡不成。我念梅花花念我。關情。獨立簷牙倚玉櫺。〔老旦〕素娘。我們向來也聞你的芳名。只是無由見面。今日之事。怎麼樣起。〔旦〕你家老爺生要奴家進府。奴家不從。以此發惱。〔老旦〕元來如此。素娘。你好不見幾。我老爺官居極品。勢焰薰天。官家尚然拱手。朝臣孰不低眉。你是個女流。到要與他抗拒。況且府中富貴。天家不如。你若進來。自然得寵。那些兒虧負了你。苦死不肯相從。〔旦〕人各有志。豈可以勢相迫。〔老旦〕不從他由你。只怕這頭門進得來出不去哩。〔旦〕他若再來相迫。我拚得一死便了。

〔尾犯序〕此夜恨無窮。似別鶴孤鴻。檻鸞囚鳳。〔老旦〕你有什么心事。就對老婢說也不妨。〔旦〕我有無限衷腸。欲訴何從。悲慟。惹禍的是花容月貌。賺人的是雲魂雨夢。從今後似提籃打水。落得一場空。〔老旦〕

〔榴花泣〕素娘。你無端何故恨匆匆。似你這月作態玉爲容。正合在綺羅叢裏承恩寵。送年華暮鼓晨鐘。素娘莫怪老婢說。你娼家有甚好行徑。風雲轉蓬。倚市門調笑將人哄。休只認酒釀花醲。瞋眼間就興盡杯空。〔旦〕

〔漁家傲〕我豈戀換羽移宮。奈女蘿怎倚孤松。就是我輩從良。須要擇人而事。〔老旦〕若要擇人。那裏有我老爺這樣對頭。〔旦低〕咳。花婆花婆。他只是俗子村夫。難管領秋月春風。〔背〕蚤上差平頭去約趙伯疇。他有詩來約我明日相會。誰想監禁在此。多分又成虛話了。看

他詩中字字芳心。懂怎割捨風流業種。男中趙伯疇。女中謝素秋。不知向來何故有此言語。想我兩人才貌呵相同。故教人作頌。只愁緣分淺到底成空。

〔尾〕通宵聒絮多驚動。〔老旦〕素娘。你何事癡迷不信從。可不道得喪悲歡總是空。

夜思千重戀舊遊。

無窮歸思滿東流。

窗殘夜月人何在。

深鎖春光一院愁。

第五齣 胡擾

〔點絳脣〕〔淨扮幹離不上〕紫塞青烟。玄菟白草。朝那道。劣馬嘶驕。眼底中原小。
漢水連天霜草平。野駝尋水磧中鳴。隴頭風急鴈不下。沙場苦戰多流星。咱家大金丞相幹離不是也。自從大宋與咱家盟約。併力攻遼。還他燕雲十六州。以償用兵之費。不意王黼背約。納我叛人張穀。爲此提兵到此。吾想宋室君臣。偷安旦夕。方且傾借元宵。咱家連夜渡河而來。剋定日期。要在元旦左右。打破汴城。務要慶賞真元宵。好快活也。把都兒們那裏。〔雜扮四卒上〕進軍黃河南。窮寇勢將變。日落沙塵昏。背河更一戰。〔見介淨〕把都兒們。自從咱渡河而南。如入無人之境。這些百姓抱頭鼠竄。紛紛逃避。此去汴京不遠。眼見得破在旦夕。須要併力殺上前去。待剋城之日。大開府庫。把金帛重賞你們。就此拔寨前進。〔雜介淨〕

〔清江引〕紛紛鐵騎如雲繞。塞滿關山道。弓隨月影彎。劍逐霜光耀。看指日間破京城如電掃。〔雜〕稟爺已到汴京城下了。〔淨〕把都兒們且不要近城。只遠遠四下圍定。待明日造起雲梯。看了城中動靜。再作道理。〔雜走圍〕